

ԼՈՒՐԵՐ ԳՈՒԳԱՐԱՅ ԹԵՄԻՑ

ԱՍՏՎԱԾԱՇՆՉԻ ՃՇՄԱՐՏՈՒԹՅՈՒՆԸ ՃԱՆԱԶԵԼԻ ԴԱՐՁՆԵՆՔ ՄԵՐ ԺՈՂՈՎՐԴԻՆ

Սուրբ Մատթեոս, Մարկոս, Ղուկաս և Հովհաննես ավետարանիչների տոնը այս տարի հոկտեմբերի 12-ին առաձնակի շուքով կատարվեց Գուգարաց թեմում: Հավարտ Ս. Պատարագի Վանաձորի առաջնորդանիստ Ս. Գրիգոր Նարեկացի եկեղեցու սրահում տեղի ունեցավ հանդիպում քաղաքի մի քանի դպրոցների բարձր դասարանների աշակերտների, ուսանողների և ուսուցիչների հետ, ուր կազմակերպվեց Սուրբ Գրքի ուսուցում՝ «Աստվածաշունչը և մենք» թեմայով: Բանախոսությամբ հանդես եկավ Ս. Գրիգոր Նարեկացի եկեղեցու հոգևոր հովիվ Ս. Վահան քահանա Ագարյանը՝ ներկայացնելով Աստվածաշունչ մատյանի բովանդակությունը, խոսելով Գրքերի Գրքի կազմավորման անցած ճանապարհի և կարևորության մասին: Տեր Հորն ուղղված հարցերից հետո շարունակվեց բանախոսությունը՝ «Աստվածաշունչը և հայոց մշակույթը» թեմայով, ուր բանախոսը հատկապես կարևորեց հայ մշակույթի վրա Աստվածաշունչ մատյանի թողած մեծ ազդեցությունը:

Նմանատիպ հանդիպում-դասախոսություններ հոգևոր հովիվների կողմից տեղի ունեցան նաև թեմի գործող եկեղեցիներում, մասնավորապես՝ Ալավերդի, Մպիտակ, Ստեփանավան, Տաշիր քաղաքների եկեղեցիներում:

Հատկանշականն այն է, որ այս հանդիպումները դարձան շարունակական, և երիտասարդներն ու պատանիներն արդեն ամիսը երկու անգամ հանդիպում են իրենց քահանաների հետ՝ ստանալով իրենց հարցերի պատասխանները:

ԵԿԵՂԵՑԻ-ՊԵՏՈՒԹՅՈՒՆ-ՀԱՄԱՐԱԿԱԿԱՆ ԿԱԶՄԱԿԵՐՊՈՒԹՅՈՒՆ ՀԱՄԱԳՈՐԾԱԿՑՈՒԹՅՈՒՆԸ՝ ՀԱՆՈՒՆ ՀԱՄԱՐԱԿՈՒԹՅԱՆ

Նպատակ ունենալով ամրապնդել Եկեղեցի-հասարակական կազմակերպություններ-պետություն կապը՝ ի շահ հասարակության և կարոտյալ խավի՝ Գուգարաց թեմի առաջնորդ Ս. Սեպուհ եպս. Չուլջյանի օրհույությամբ և «Բոլոր սար» ՀԿ նախաձեռնությամբ հոկտեմբերի 24-ին Առաջնորդարանի սրահում տեղի ունեցավ «Վանաձոր համայնքի սոցիալական հիմնախնդիրները» թեմայով կլոր սեղան-քննարկում Վանաձոր համայնքի հասարակական կազմակերպությունների, հոգևոր և պետական այրերի մասնակցությամբ:

Վանաձորում գործող տասնյակից ավելի հասարակական կազմակերպությունները շատ անգամներ են միասին հավաքվել կլոր սեղանի շուրջ, քննարկել ու վեր հանել համայնքի հիմնախնդիրները և փորձել լուծում տալ դրանց: Սակայն հոգևոր և պետական կառույցների գործուն մասնակցությամբ արդեն կոնկրետ քայլ ու որպես արդյունք մի քայլ առաջ է այս հանդիպումը: Դեռևս 2005 թ. ԵՀԽ հայաստանյան միջեկեղեցական բարեգործական Կլոր սեղանի հիմնադրամի կողմից Վանաձորի հասարակական կազմակերպությունների համար «Քաղաքացիական հասարակության

խմբերի ներուժի և կարողությունների զարգացում» ծրագրի շրջանակներում կազմակերպված սեմինար-դասընթացները տվեցին իրենց ցանկալի արդյունքը: Այս տարվա սեպտեմբերից ծրագրին մասնակից «Բոլոր սար», «Առաջընթաց», «Ընտանիք և երեխաներ», «Բնապահպանություն» ՀԿ-ները միասին իրագործում են «Այսօր կերտում ենք ապագան» ծրագիրը՝ ուղղված Վանաձոր համայնքի 14-25 տարեկան պատանիների ու երիտասարդների կարողությունների ու հմտությունների զարգացմանը: Առաջնորդարանում կայացած «Վանաձոր համայնքի սոցիալական հիմնախնդիրները» թեմայով կլոր սեղան-քննարկումը այս ծրագրի մի մասն էր կազմում, որը հնարավորություն է ընձեռում ՀԿ-ների հետագա համագործակցությանը՝ աջակից ունենալով Եկեղեցուն և պետական կառույցներին:

Որպես համագործակցության արդյունք՝ քննարկման ընթացքում թեմակալ առաջնորդը հանդես եկավ գործնական առաջարկություններով. ուշադրությունից ու խնամքից դուրս մնացած մանուկներին ցուցաբերել նյութական և բարոյահոգեբանական աջակցություն, կազմակերպել նրանց ամառային հանգիստը թեմապատկան «Ծիծեռնակ» ճամբարում, աջակցել հաշմանդամներին՝ ձեռք բերելու հաշմանդամության սայլակներ: Գործնական առաջարկությամբ հանդես եկավ նաև մարզպետի խորհրդական Էդիկ Հովսեփյանը:

Հանդիպումը խոստումնալից էր՝ տեղեկատվության փոխանակման, հետագա համագործակցության, առաջիկայում նոր հանդիպումների ու քննարկումների կազմակերպման և համատեղ ծրագրերի իրականացման առումով:

ԱՌՆՈ ԲԱԲԱԶԱՆՅԱՆԻ 85-ԱՄՅԱԿԻՆ ՆՎԻՐՎԱԾ ՀԱՄԵՐԳ ՎԱՆԱԶՈՐԻ Ս. ԳՐԻԳՈՐ ՆԱՐԵԿԱՑԻ ԵԿԵՂԵՑՈՒՄ

Վանաձորի առաջնորդանիստ Ս. Գրիգոր Նարեկացի եկեղեցին վանաձորցիների համար ոչ միայն Աստծո տաճար ու աղոթքի տուն է, այլև հոգևոր ու մշակութային օջախ: Եկեղեցու ներքնահարկ սրահում կատարվել են Ձատկական ու Համբարձման հանդիսություններ, երիտասարդների հետ հանդիպումներ, բանախոսություններ:

Նոյեմբերի 13-ին Ս. Գրիգոր Նարեկացի եկեղեցու երգչախումբը և քաղաքապետարանի կամերային երգչախումբը եկեղեցու ներքնահարկ սրահում կազմակերպել էր համերգ՝ նվիրված երաժշտական արվեստի վառ ու ինքնատիպ կոմպոզիտոր և վիրտուալ դաշնակահար Առնո Բաբաջանյանի 85-ամյա հոբելյանին: Բաբաջանյանի սիմֆոնիաները, դաշնամուրային, վոկալ ու գործիքային ստեղծագործությունները հնչել են աշխարհի տարբեր երկրներում և Հայաստանը հայտնի դարձրել իր երգարվեստով ու մշակույթով: Երգչախմբի (գեղ. ղեկավար՝ Ռ. Մխիթարյան) բարձրարվեստ կատարումները հպարտությամբ ու բերկրանքով լցրեցին երաժշտասեր ունկնդրի հոգին, իսկ «Յորժամ», «Կիրակի», «Առաջին սիրտ երգը», «Երգ սիրտ մասին», «Նոկտյուրն» և հնչած բազմաթիվ այլ երգերը, շարականներն ու կոմպոզիցիաները ունկնդիրներին ստիպեցին անմիջական մասնակիցը դառնալու ժողովրդականություն վայելող բաբաջանյանական ստեղծագործություններին: Հանդիսությանը ներկա էին Գուգարաց թեմի առաջնորդ Ս. Մեպուհ եպս. Չուլջյանը, Ս. Գրիգոր Նարեկացի եկեղեցու հոգևոր հովիվ Ս. Վահան քին. Ազարյանը, Ստեփան Զորյանի տուն-թանգարանի տնօրեն, բանաստեղծուհի Լ. Անթառանյանը, ուսուցիչներ, աշակերտներ, դասական արվեստի բազմաթիվ երկրպագուներ: